

UDHËZIM
Nr. 33, datë 20.12.2023

PËR MËNYRËN E ZBATIMIT TË VENDIMIT TË KËSHILLIT TË MINISTRAVE NR. 161,
DATË 21.3.2018, “PËR PAGESËN E SË ARDHURËS NGA PAPUNËSIA”, I NDRYSHUAR
(ndryshuar me udhëzimin nr. 888, datë 29.10.2024)

(i përditësuar)

Në mbështetje të nenit 102, pika 4, e Kushtetutës së Republikës së Shqipërisë dhe pikës 24, të vendimit nr. 161, datë 21.3.2018, të Këshillit të Ministrave, “Për pagesën e së ardhurës nga papunësia”, i ndryshuar,

UDHËZOJ:

1. Në zbatim të pikës 2 të vendimit nr. 161, datë 21.3.2018, të Këshillit të Ministrave, “Për pagesën e së ardhurës nga papunësia”, të ndryshuar, përfitojnë të ardhura nga papunësia personat të cilët plotësojnë kushtet e mëposhtme:

a) të kenë kontribuar në sigurimin shoqëror si punëmarrës për një periudhë të paktën 12-mujore, për çdo rast përfitimi;

b) të jenë regjistruar si punëkërkues të papunë pranë strukturës vendore përkatëse të punësimit;

c) të kenë paraqitur kërkesën dhe dokumentacionin sipas pikës 6, të vendimit nr. 161, datë 21.3.2018, të ndryshuar për të përfituar të ardhurën nga papunësia, pranë strukturës vendore përkatëse brenda 60 ditëve kalendarike nga data e shkëputjes së marrëdhënies së punësimit me punëdhënësin.

2. Kërkuesit muk përfitojnë pagesën e së ardhurës nga papunësia nëse nuk plotësojnë kushtin e parashikuar në shkronjën “c”, të pikës 1, me përjashtim të rasteve të paaftësisë së përkohshme për punë, paaftësi e vërtetuar me raport mjekësor ose dokumente shoqëruese, që kanë qenë të shtruar në spital (fletëhyrje dhe fletëdalje nga spitali).

3. Kategoritë përfituese të pagesës së të ardhurës nga papunësia janë:

a) *Të gjithë personat, të cilët kanë kontribuar si punëmarrës në sigurimet shoqërore, për një periudhë të paktën 12-mujore, për çdo rast përfitimi;*

b) Gratë, të cilat përfundojnë trajtimin me të ardhurën e barrë lindjes dhe në momentin që kthehen në vendin e punës iu ndërpritet marrëdhënia individuale e punës;

c) Burrat, të cilët përfundojnë trajtimin e përfitimit të përkujdesjes për fëmijën, por jo më parë se 63 ditë pas lindjes së fëmijës dhe në momentin që kthehen në vendin e punës, iu ndërpritet marrëdhënia individuale e punës;

ç) Personat, të cilët janë shkëputur nga puna për arsye të përfitimit të paaftësisë së përkohshme dhe mbas mbarimit të kësaj periudhe, në momentin që kthehen në vendin e punës, iu ndërpritet marrëdhënia individuale e punës;

d) Ushtarakët e liruar nga detyra, të cilët nuk përfitojnë të ardhura nga akte të tjera ligjore dhe nënligjore si pension të parakohshëm suplementar ose pension pleqërie;

e) Shtetasit e huaj, që jetojnë në Shqipëri, trajtohen në kushte të barabarta me shtetasit shqiptarë, sipas pikës 2 shkronja “a”, për përfitimin e të ardhurës nga papunësia.

4. Për rastet e përsëritura të përfitimit, kur personi paraqet kërkesën më shumë se një herë, sipas shkronjave “a”, “b”, “c”, “ç” dhe “d” të pikës 4 të vendimit nr. 161, datë 21.3.2018, të ndryshuar, trajtohen duke llogaritur periudhën e kontributeve si punëmarrës, duke filluar nga përfitimi i fundit.

5. Në zbatim të pikës 6, shkronja “ç” të vendimit nr. 161, datë 21.3.2018, të ndryshuar, përfituesi duhet të sjellë për çdo vit të ri akademik vërtetimin për fëmijët që ndjekin shkollën.

6. Pagesën e së ardhurës nga papunësia nuk e përfitojnë personat të cilët:

- a) janë punëdhënës ose të vetëpunësuar në qytet dhe fshat;
- b) rezultojnë me aktivitet të pambyllur në sistemin tatimor;
- c) janë duke vuajtur dënim me heqje lirie;
- ç) largohen nga puna me dëshirën e tyre;
- d) janë larguar jashtë shtetit për arsye të ndryshme dhe nuk plotësojnë detyrimin sipas pikës 8 shkronja “c” të vendimit nr. 161, datë 21.3.2018, të ndryshuar.

Verifikimet kryhen nga çdo strukturë vendore e punësimit në momentin e administrimit të kërkesës për përfitim të pagesës së të ardhurës nga papunësia.

7. Në të gjitha rastet e përfitimit të së ardhurës nga papunësia, të ndërprera për arsye punësimi të përkohshëm, personi ka të drejtë të marrë pjesën e ngelur, por me kusht që rifillimi i periudhës së përfitimit të pagesës së të ardhurës nga papunësia, të jetë brenda 24 muajve nga shkëputja për herë të parë nga puna dhe periudha e përfitimit të mos jetë më shumë se 3 muaj për personat, që kanë të paktën 1 vit punë, 6 muaj për personat që kanë të paktën 3 vjet punë, 9 muaj për personat që kanë të paktën 5 vjet punë, dhe 12 muaj për personat që kanë mbi 10 vjet punë.

Në rastet e ndërprerjes të së ardhurës nga papunësia, për arsye të përfitimit të lejes së lindjes, pjesa e ngelur, në të gjitha rastet e përfitimit, merret pas përfundimit të lejes së lindjes.

8. Kategoritë përfituese të së ardhurës nga papunësia, të cilët e ndërpresin pagesën për shkak punësimi, aftësimi apo leje lindjeje, apo raste të tjera të përligjura, rikthehen në skemë për përfitimin e ngelur, me nivelin e së ardhurës nga papunësia në momentin e rikthimit.

9. Përfituesit që ndjekin kurse kualifikimi dhe rikualifikimi, përfitojnë pagesën e së ardhurës nga papunësia gjatë kohës së zhvillimit të kurseve, në rast se nuk paguhen nga ndonjë burim tjetër për këtë periudhë.

10. Rastet, kur përfituesi është i justifikuar për mosparaqitje, janë:

- a) sëmundje e vërtetuar me dokumente fletështrimi dhe fletëdaljeje nga spitali;
- b) vdekja e një pjesëtari të familjes, e vërtetuar me certifikatë vdekjeje;
- c) ndalimi nga organet e drejtësisë, e vërtetuar me dokumentacionin përkatës.

11. Në të gjitha rastet e përcaktuara në pikën 8 të vendimit nr. 161, datë 21.3.2018, të ndryshuar, periudha e ngelur nuk përfitohet.

12. Udhëzimi nr. 17, datë 14.5.2018, “Për zbatimin e vendimit të Këshillit të Ministrave nr. 161, datë 21.3.2018, “Për pagesën e së ardhurës nga papunësia”, shfuqizohet.

Ky udhëzim hyn në fuqi pas botimit në Fletoren Zyrtare.

MINISTËR I FINANCAVE DHE EKONOMISË
Ervin Mete